

Na osnovu čl. 4.2. i 4.8. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11) i člana 33. Metodologije za izradu tarifa za usluge distribucije električne energije u Brčko Distriktu Bosne i Hercegovine ("Službeni glasnik BiH", br. 89/11 i 90/14), rješavajući po zahtjevu Javnog preduzeća za komunalne djelatnosti "Komunalno Brčko" d.o.o., Brčko, broj 03-02700/25 od 27. novembra 2025. godine, na sjednici Državne regulatorne komisije za električnu energiju održanoj 21. januara 2026. godine, donijeta je

ODLUKA

O TARIFAMA ZA USLUGE DISTRIBUCIJE ELEKTRIČNE ENERGIJE U BRČKO DISTRIKTU BOSNE I HERCEGOVINE

Član 1.

(Predmet)

Ovom Odlukom utvrđuju se tarife, odnosno cijene distribucije električne energije izražene kroz tarifne stavove, koji služe za obračun i naplatu usluga distribucije električne energije od kupaca električne energije u Brčko Distriktu Bosne i Hercegovine.

Član 2.

(Potrebni godišnji prihod)

Javnom preduzeću za komunalne djelatnosti "Komunalno Brčko" d.o.o., Brčko (u daljnjem tekstu: Komunalno Brčko) za djelatnost distribucije električne energije određuje se potrebni godišnji prihod u iznosu od 18.837.808 KM.

Član 3.

(Tarifni stavovi)

Tarifni stavovi za usluge distribucije električne energije za kupce u Brčko Distriktu Bosne i Hercegovine su sljedeći:

Opis			Tarifni stavovi za usluge distribucije električne energije*		
			Obračunska snaga	Aktivna električna energija	Prekomjerno preuzeta reaktivna električna energija
Kategorije potrošnje i grupe kupaca	Jedinica mjere	KM/kW/mjesec	feninga/kWh	feninga/kvarh	
Naziv kategorije	Naziv grupe				Doba dana
35 kV		VT	1,73	2,52	
		MT	0,87		
10 kV		VT	2,08	3,18	
		MT	1,04		
0,4 kV – javna rasvjeta		ST	7,88		
0,4 kV – ostala potrošnja	1 TG	VT	2,81	4,40	
		MT	1,41		
	2 TG	ST	4,66	3,95	
		VT	9,04		
3 TG	VT	4,52			
	MT				
0,4 kV – domaćinstva	1 TG	ST	4,73		
		VT	6,56		
	2 TG	MT	3,28		

*Tarifni stavovi ne sadrže iznos poreza na dodatu vrijednost.

Član 4.

(Obračunska snaga)

Obračunska snaga iznosi 5 kW za tarifne grupe kupaca iz kategorija potrošnje na 0,4 kV kod kojih se obračunska snaga ne utvrđuje mjerenjem (2. i 3. tarifna grupa iz kategorije *ostala potrošnja*, 1. i 2. tarifna grupa iz kategorije *domaćinstva*).

Član 5.

(Tarifni stavovi prema dobu dana)

- (1) Tarifni stavovi za aktivnu energiju primjenjuju se prema dobu dana, i to:
 - a) veći dnevni tarifni stavovi (VT) od 6 do 22 sata tokom zimskog računanja vremena, odnosno od 7 do 23 sata tokom ljetnog računanja vremena,
 - b) manji dnevni tarifni stavovi (MT) od 22 do 6 sati tokom zimskog računanja vremena, odnosno od 23 do 7 sati tokom ljetnog računanja vremena.
- (2) Izuzetno od stava (1) ovog člana, za kategoriju potrošnje *domaćinstva* tarifni stavovi za aktivnu energiju primjenjuju se prema dobu dana, i to:
 - a) veći dnevni tarifni stavovi (VT) od 7 do 13 sati i od 16 do 22 sata tokom zimskog računanja vremena, odnosno od 8 do 14 sati i od 17 do 23 sata tokom ljetnog računanja vremena,
 - b) manji dnevni tarifni stavovi (MT) od 13 do 16 sati i od 22 do 7 sati tokom zimskog računanja vremena, odnosno od 14 do 17 sati i od 23 do 8 sati tokom ljetnog računanja vremena, te nedjeljom.

Član 6.

(Obaveza objave tarifnih stavova)

Javno preduzeće za komunalne djelatnosti “Komunalno Brčko” d.o.o., Brčko, dužno je na odgovarajući način objaviti tarifne stavove i relevantne odredbe ove Odluke, te ih učiniti dostupnim svim kupcima na području Brčko Distrikta BiH.

Član 7.

(Završne odredbe)

- (1) Ova Odluka stupa na snagu danom donošenja, a primjenjuje se od 1. februara 2026. godine.
- (2) Dispozitiv Odluke objavljuje se u “Službenom glasniku BiH” i službenom glasilu Brčko Distrikta BiH.

Obrazloženje

Shodno Odluci o osnivanju javnog preduzeća “Komunalno Brčko” d.o.o. Brčko (“Službeni glasnik Brčko Distrikta BiH”, br. 20/07, 21/07, 24/08 i 33/09), Komunalno Brčko dužno je omogućiti distribuciju električne energije, te vršiti snabdijevanje korisnika sistema i kupaca električnom energijom na svom području djelovanja.

U skladu sa članom 7. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11), u daljnjem tekstu: Zakon o prijenosu, te članom 10. Zakona o električnoj energiji (“Službeni glasnik Brčko Distrikta BiH”, broj 27/21), za obavljanje ovih aktivnosti Komunalno Brčko je bilo dužno pribaviti licencu Državne regulatorne komisije za električnu energiju (u daljnjem tekstu: DERK), a prema uvjetima, kriterijima i procedurama koje odredi DERK.

Komunalno Brčko je vlasnik licence za obavljanje djelatnosti distribucije električne energije na području Brčko Distrikta BiH, registracijski broj 05-28-12-216-19/20, izdate Odlukom

DERK-a, 7. oktobra 2020. godine (“Službeni glasnik BiH”, broj 67/20) i licence za obavljanje djelatnosti trgovine i snabdijevanja električnom energijom na teritoriji Bosne i Hercegovine, registracijski broj 05-28-12-177-19/22, izdate Odlukom DERK-a, 28. septembra 2022. godine (“Službeni glasnik BiH”, broj 67/22).

Tarife za usluge proizvodnje, distribucije i snabdijevanja električnom energijom u Brčko Distriktu BiH, saglasno naprijed pomenutim zakonima, regulira i odobrava DERK.

Komunalno Brčko je 27. novembra 2025. godine dopisom broj 03-02700/25, uputilo DERK-u Zahtjev za pokretanje tarifnog postupka za usluge distribucije i snabdijevanja električnom energijom u okviru univerzalne usluge u Brčko Distriktu BiH.

DERK je 4. decembra 2025. godine donio Zaključak o pokretanju postupka određivanja tarifnih stavova za usluge distribucije električne energije i tarifnih stavova za snabdijevanje u okviru univerzalne usluge u Brčko Distriktu BiH, broj 04-28-5-342-3/25.

Tarifni postupak je proveden u skladu sa pravilima DERK-a. Obavijest za javnost u postupku određivanja tarifa, koja sadrži informacije o načinu sticanja statusa umješača i održavanju formalne javne rasprave, objavljena je 5. decembra 2025. godine u dnevnim novinama i na internet stranici DERK-a. U postupku nije bilo subjekata zainteresiranih za dobivanje statusa umješača. Pripremna rasprava održana je 12. decembra 2025. godine u prostorijama DERK-a u Tuzli, a formalna javna rasprava 18. decembra 2025. godine u Brčkom. Izvještaj voditelja postupka dostavljen je podnosiocu zahtjeva 29. decembra 2025. godine koji je svojim obraćanjem 12. januara 2026. godine saopštio da je tarifni postupak sproveden korektno te da predložene tarife u najvećoj mjeri održavaju poslovanje podnosioca zahtjeva.

Razmatranje podnesenog zahtjeva kroz postupak odobravanja tarifa, u najvećoj mogućoj mjeri mora ispoštovati osnovna načela koja propisuju da će tarife biti pravedne i razumne, ravnopravne, zasnovane na objektivnim kriterijima i opravdanim troškovima i određene na transparentan način. Regulirani subjekt dužan je dokazati da predložena tarifa ispunjava zahtjeve iz zakôna BiH i pravila i propisa DERK-a.

Kao glavni razlog zahtjeva za povećanje tarifnih stavova za distribuciju električne energije, navodi se povećanje nabavne cijene električne energije za 2026. godinu koju je Komunalno Brčko ugovorilo sa isporučiocem JP Elektroprivreda Bosne i Hercegovine, d.o.o, Sarajevo, a koja iznosi 19,0425 feninga/kWh, što predstavlja povećanje od 8,18% u odnosu na ugovorenu cijenu nabavke električne energije za 2025. godinu koja je iznosila 17,60247 feninga/kWh. Ugovorena nabavna cijena električne energije za 2026. godinu uključuje troškove po osnovu plaćanja tarife za usluge prijenosa, tarife za rad nezavisnog operatora sistema i tarife za sistemsku uslugu.

U tabeli 1. dati su podaci za djelatnost distribucije električne energije, i to odobreni troškovi za 2023., 2024. i 2025. godinu, planirani troškovi za 2026. godinu, te iznos odobrenih troškova za 2026. godinu.

Tabela 1.

	DISTRIBUCIJA Vrsta troškova	2023. Odobreno (KM)	2024. Odobreno (KM)	2025. Odobreno (KM)	2026. Zahtjev (KM)	2026. Odobreno (KM)
1.	Materijalni troškovi	950.000	950.000	700.000	600.000	600.000
2.	Troškovi usluga	330.000	330.000	440.000	590.000	590.000
3.	Troškovi radne snage	5.115.000	5.115.000	6.350.000	7.225.000	7.225.000
4.	Amortizacija	875.000	875.000	960.000	960.000	960.000
5.	Nematerijalni troškovi	200.000	200.000	260.000	460.000	360.000
6.	Ostali rashodi	120.000	120.000	200.000	200.000	200.000
7.	Troškovi kamata i ostali finansijski troškovi	90.000	90.000	110.000	110.000	110.000
8.	Regulatorna naknada	80.000	80.000	104.000	118.000	118.000
A	Ukupni troškovi i rashodi	7.760.000	7.760.000	9.124.000	10.263.000	10.163.000
B	Ostali prihodi (donirana sredstva i komercijalne usluge)	250.000	250.000	400.000	0	150.000
	Potreban prihod (A-B)	7.510.000	7.510.000	8.724.000	10.263.000	10.013.000

Komunalno Brčko je u svom zahtjevu zatražilo priznavanje troškova distributivne djelatnosti od 18.781.74 KM za 2026. godinu uz prepodešavanje važećih tarifnih stavova u okviru odobrenih troškova na način da prosječna mrežarina uključujući sve naponske nivoe iznosi 7,11 feninga/kWh.

Komisija usmjerava svoja razmatranja na sve elemente u troškovnoj strukturi koje je isticao podnosilac zahtjeva, analizu troškova i prihoda izloženu u Izvještaju voditelja postupka, činjenici da nije bilo komentara podnosioca zahtjeva tokom cijelog postupka, te cjelovitom opservacijom odlučuje o podnijetom zahtjevu. Tragom takve obaveze, Komisija izlaže svoja sljedeća stanovišta:

Prilikom utvrđivanja *troškova materijala*, Komisija prihvata dostavljenu argumentaciju regulisanog subjekta. Prepoznajući ključni značaj ovih troškova za održavanje kontinuiteta i stabilnosti u obavljanju distributivne djelatnosti, te uvažavajući činjenicu da je zahtjev restriktivniji u odnosu na prethodno odobrena sredstva, Komisija potvrđuje opravdanost traženog iznosa. Slijedom navedenog, odobrava se trošak materijala u ukupnom iznosu od 600.000 KM.

Troškovi usluga planirani su u vrijednosti od 590.000 KM. Komunalno Brčko je u svom odgovoru na formalnoj javnoj raspravi, obrazložilo zahtjev značajnim povećanjem cijena usluga koje obavljaju eksterni dobavljači, a vezani su najvećim dijelom za prosjeku dalekovodnih trasa, rekonstrukciju objekata te održavanje radnih mašina nužnih za adekvatno održavanje elektrodistributivnog sistema u Brčko Distriktu. Komisija uvažava prezentiranu argumentaciju tokom javne rasprave, te odobrova troškove usluga u zatraženom iznosu od 590.000 KM a što predstavlja racionalan i nužan pristup koji osigurava održavanje kvaliteta usluga.

Na poziciji troškova radne snage za djelatnost distribucije električne energije u 2026. godini, JP „Komunalno Brčko“ zahtijevalo je iznos od 7.225.000 KM. Tokom javne rasprave pojašnjeno je da Plan poslovanja za 2026. godinu predviđa popunjavanje upražnjenih pozicija u RJ Elektrodistribucija u skladu sa važećom sistematizacijom. Fokus je stavljen na angažovanje stručnog kadra elektro struke, čiji je hronični deficit do sada direktno ugrožavao kvalitet izvršenja elektrodistributivne djelatnosti. Pored toga, planirano je povećanje plata od 10% za sve zaposlene na nivou preduzeća, čime se vrši usklađivanje sa rastom troškova života

(inflacijom). Uzimajući u obzir prije svega kritičnu potrebu za zapošljavanjem stručne radne snage, te prevenciju odlaska stručnih kadrova, odobrava se traženi iznos od 7.225.000 KM.

Komunalno Brčko je zatražilo odobrenje *troška amortizacije* za 2026. godinu u iznosu od 960.000 KM kao rezultat obračuna amortizacije na sredstva koja koristi i sredstva koja planira nabaviti. Komisija uvažava argumentaciju voditelja postupka, prepoznajući potrebu za stabilnim investiranjem u infrastrukturu, te odobrava trošak amortizacije u iznosu od 960.000 KM, što je na nivou sredstava odobrenih u prethodnom postupku. Ovaj iznos je opravdan planiranim ciklusom nabavki i neophodnošću redovnog obnavljanja sredstava za rad, čime se osigurava dugoročna održivost i operativna spremnost preduzeća u pružanju usluga.

U okviru kategorije *nematerijalnih troškova*, regulisani subjekat je zatražio iznos od 460.000 KM. Tokom javne rasprave, Komunalno Brčko je dodatno obrazložilo zahtjev kroz povećanje troškova stručne obuke za rad sa specifičnim uređajima, angažmana stručnih komisija, osiguranja radnika od nesreće na radu, te troškova osiguranja i registracije vozila, uz pripadajuće administrativne i sudske takse. Uvažavajući navedenu argumentaciju, Komisija odobrava ovaj trošak u iznosu od 360.000 KM. Napominje se da ovaj iznos ne obuhvata regulatornu naknadu, koja se u ovoj Odluci iskazuje kao zasebna stavka, iako je regulisani subjekat knjigovodstveno evidentira na poziciji nematerijalnih troškova.

Za poziciju *ostali rashodi*, Komunalno Brčko zatražilo je 200.000 KM što odgovara iznosu odobrenom u prethodnom tarifnom postupku. Posmatrajući veličine iz prethodnog razdoblja može se zaključiti da se radi o ujednačenim iznosima na godišnjem nivou, a fluktuacije se dešavaju zbog povremenih ispravki vrijednosti (otpisa nenaplativih potraživanja) ili sudskih postupaka sa presudama za naknadu šteta koje javno preduzeće mora isplatiti. Komisija u okviru ostalih rashoda odobrava iznos za 2026. godinu od 200.000 KM, što smatra dostatnim za izvršenje planiranih obaveza.

U pogledu *Troška kamata i ostalih finansijskih troškova* Komisija uvažava povećane potrebe za finansiranjem preduzeća iz pozajmljenih sredstava zbog znatnog rasta troškova nabavke energije, te odobrava trošak kamata i ostalih finansijskih troškova za djelatnost distribucije u visini zahtijevanog iznosa od 110.000 KM.

Podnosiocu zahtjeva se kao opravdani trošak priznaje iznos od 118.000 KM po osnovu obaveze plaćanja *regulatorne naknade* propisane Odlukom o utvrđivanju regulatorne naknade za 2026. godinu ("Službeni glasnik BiH", broj 56/25).

Ostali prihodi: Komunalno Brčko u sklopu svog poslovanja ostvaruje značajne prihode po osnovu aktivnosti koje su vezane za djelatnost distribucije i snabdijevanja: priključci na mrežu, povećanje priključne snage, izdavanje saglasnosti, usluge građanima itd. Budući da se usluge održavanja javne rasvjete i usluge građanima u Brčko Distriktu BiH mogu smatrati uslugama koje se obavljaju na komercijalnoj osnovi, Komisija smatra opravdanim da se ukupni operativni i kapitalni troškovi distribucije umanje za vrijednost od 150.000 KM.

Sagledavajući dostavljenu dokumentaciju i odgovore iznijete na formalnoj javnoj raspravi, Komisija u potpunosti prihvata argumentaciju voditelja postupka pri određivanju iznosa pojedinih troškova datih u tabeli 1, te odobrava iznos od 10.163.000 KM u svrhu servisiranja operativnih i kapitalnih troškova djelatnosti distribucije za 2026. godinu odnosno, nakon reduciranja za komercijalne prihode, iznos od 10.013.000 KM koji će biti ostvaren primjenom tarifnih stavova.

Svi tarifni stavovi donose se u skladu sa Metodologijom za izradu tarifa za usluge distribucije električne energije u Brčko Distriktu Bosne i Hercegovine ("Službeni glasnik BiH", br. 89/11 i 90/14), u daljnjem tekstu: Metodologija.

U cilju određivanja distributivne mrežarine, odnosno tarifnih stavova za usluge distribucije električne energije u Brčko Distriktu BiH, pored operativnih i kapitalnih troškova, potrebno je odrediti i ostale troškove koji su sastavni dio ukupnih troškova distributivne djelatnosti (tzv. preneseni troškovi koji uključuju: *trošak distributivnih gubitaka*, *troškove prijenosnog sistema*, *troškove rada nezavisnog operatora sistema*, *troškove po osnovu tarife za sistemsku uslugu*) i *troškove balansiranja*.

Trošak distributivnih gubitaka električne energije utvrđuje se na osnovu nabavne cijene električne energije koja u sebi ne sadrži prenesene troškove (tarifa za usluge prijenosa, tarifa za rad nezavisnog operatora sistema, tarifa za sistemsku uslugu i troškova balansiranja) i odobrene količine električne energije za pokrivanje gubitaka. Cijena za izračun troška pokrivanja gubitaka u distributivnom sistemu iznosi 17,602 feninga/kWh, te predstavlja vrijednost ugovorene nabavne cijene električne energije za 2026. godinu od 19,0504 feninga/kWh, umanjenu za prenesene troškove. U skladu sa članom 12. stav (3) Metodologije, DERK odobrava opravdanu stopu, odnosno procenat gubitaka u distributivnom sistemu. Ostvareni gubici u 2025. godini iznosili su 9,46% od ukupne nabavljene energije, dok su u 2024. godini iznosili 10,00%. U cilju smanjenja distributivnih gubitaka i njihovog postepenog svodenja na nivo prosjeka u BiH, a imajući u vidu operativne mjere koje Komunalno Brčko kontinuirano provodi u cilju njihovog smanjenja, odobravaju se gubici od 9,00%, što u odnosu na ukupno preuzetu energiju od 291 GWh iznosi 26.190.000 kWh. Uzimajući u obzir cijenu energije koja iznosi 17,602 feninga/kWh, trošak energije gubitaka u distributivnom sistemu iznosi 4.609.964 KM.

Troškovi prijenosnog sistema, u skladu sa Odlukom DERK-a broj 04-28-5-333-46/16 od 3. aprila 2017. godine ("Službeni glasnik BiH", broj 28/17) za korisnike distributivnog sistema određeni su na bazi jediničnih cijena od 0,578 feninga/kWh za preuzetu energiju i 1,472 KM/kW za preuzetu snagu iz prijenosnog sistema, odnosno Ugovoru o nabavci energije gdje je prijenosna tarifa za snagu svedena na iznos 0,2744 feninga/kWh preuzete energije, te imajući u vidu da je planirano preuzimanje 291.000.000 kWh električne energije u 2026. godini, oni iznose 2.480.484 KM.

Troškovi rada nezavisnog operatora sistema, u skladu sa Odlukom DERK-a broj 04-28-5-306-31/25 od 23. decembra 2025. godine ("Službeni glasnik BiH", broj 79/25) na bazi tarife za rad nezavisnog operatora sistema u iznosu od 0,1171 feninga/kWh koja se plaća za električnu energiju preuzetu iz prijenosnog sistema (L komponenta) i planiranog preuzimanja 291.000.000 kWh energije iznose 340.761 KM.

Troškovi po osnovu tarife za sistemsku uslugu, u skladu sa Odlukom o tarifama za sistemsku i pomoćne usluge ("Službeni glasnik BiH", broj 2/23), obračunavaju se prema jedinstvenoj tarifi od 0,4789 feninga/kWh i iznose 1.393.599 KM.

Troškovi balansiranja nemaju uticaja na tarifu za distribuciju, s obzirom na to da prema odredbama Ugovora o nabavci električne energije za 2026. godinu, nije predviđeno plaćanje ovih troškova.

Ukupan potreban prihod za izračun tarifa za uslugu distribucije električne energije u Brčko Distriktu BiH iznosi 18.837.808 KM i sastoji se od operativnih i kapitalnih troškova djelatnosti distribucije u iznosu 10.013.000 KM, troškova gubitaka električne energije u distributivnom sistemu u iznosu 4.609.964 KM i prenesenih troškova (usluge prijenosa električne energije, usluge nezavisnog operatora sistema i sistemske usluge) u iznosu 4.214.844 KM.

Ukupni troškovi distributivnog sistema u Brčko Distriktu BiH se, prema čl. 26. i 28. Metodologije, alociraju na kategorije potrošnje korisnika distributivnog sistema po tarifnim elementima i stavovima. Uzimajući u obzir odobrene troškove za distribuciju električne

energije, te aktuelne energetske veličine na području kojim kao operator distributivnog sistema upravlja Komunalno Brčko (264.810.000 kWh planirana prodaja krajnjim kupcima u 2026. godini), prosječna tarifa za distribuciju električne energije iznosi 7,11 feninga/kWh, što je na nivou prosječne tarife odobrene u prethodnom tarifnom postupku.

Alociranje troškova distributivnog sistema na tarifne elemente je izvršeno u odnosu 37,0% na tarifni element snaga, 62,4% na tarifni element aktivna energija i 0,6% na tarifni element prekomjerno preuzeta reaktivna energija.

Tarifni stavovi za distribuciju električne energije u Brčko Distriktu BiH ne odražavaju u punom obimu sve aktivnosti preduzeća u djelatnosti distribucije električne energije zbog nemogućnosti vlasničke uknjižbe stalnih sredstava koja preduzeće koristi za obavljanje svoje djelatnosti o čemu odlučuju relevantne institucije Brčko Distrikta Bosne i Hercegovine.

Prema mišljenju Komisije, predloženi tarifni stavovi pružaju realnu osnovu Kompaniji da za djelatnost distribucije električne energije ostvari potreban prihod koji omogućava nesmetano funkcioniranje.

Na osnovu naprijed izloženih stanovišta Komisije, u okvirima njenih diskrecijskih prava da potvrdi reprezentativnost i opravdanost svih podnijetih podataka i tvrdnji, da procjenjuje stepen vjerovatnoće ostvarenja svih prognoziranih troškova i rashoda i da odobrava tarife uvažavajući i konkretne okolnosti u periodu podnošenja zahtjeva za odobrenje tarifa sve do objektivizacije uvjeta za njihovo preciznije određivanje, a koristeći ovlaštenja utvrđena Zakonom o prijenosu da uređuje i pitanja reguliranja distribucije električne energije kupcima na području Brčko Distrikta BiH, Komisija donosi odluku kao u dispozitivu.

DERK će kontinuirano pratiti efekte primjene usvojenih tarifa, zadržavajući pravo podešavanja tarifnih stavova kada ocijeni da je to potrebno.

U skladu sa članom 9.2. Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 04-28-5-342-17/25
21. januara 2026. godine
Tuzla

Predsjedavajući Komisije
Suad Zeljković